

四庫全書

集部

欽定四庫全書

懷麓堂集卷九十六

明 李東陽 撰

文續稿六

東祀錄

請書刻御製碑題本

題為公務事先該巡撫山東都察院右副都御史徐源等  
奏闕里孔子廟修建落成續該禮部題乞御製碑及遣官

祭告等因奏聖旨是遣尚書李東陽祭告欽此除欽遵外  
臣竊惟修建孔廟朝廷重事而御製祝文及遣祭祀文尤  
陛下隆師重道之盛心是宜刻之金石以昭示萬世但本  
廟僻在一方恐無繕寫楷書之人不能揚厲宸章有孤恩  
典臣奉將使命事體相關乞令制勅房中書舍人喬宗齋  
捧前項御製文字往彼書寫上石仍乞帶領工部文思院  
副使閻傑就彼鐫刻事畢之日即令回京該部施行照例  
應付廩給脚力便益等因奉聖旨都准該衙門知道欽此

代祀孔廟有述

我皇重孔教廟祀嚴春秋睠茲闕里災有命事崇修憲  
使告成功封章達宸旒儒臣奉明祭吉日夙已諏靡盥  
信王事瀕行懼國憂蒼黃變凶吉兩月停余輶閏夏氣  
暄熱往哉難久留黃扉地親切使命渺無由向非重道  
心詎敢息與游朝辭魏闕下暮宿張灣頭發軔芳草草  
計程勿悠悠江湖與廟廊自古相爲謀

憂旱辭

黃塵赤日無南北平田見土不見麥秋麥垂垂盡枯死  
春麥雖青不滿咫秋田種少未種多田家四顧無妻子  
官河水淺舟不行漕舟不載南舟名河西鈔關坐不稅  
大倉粳糯何時至一春無雨過半夏貧民望雨如望赦  
安得一雨如懸河坐令愁怨成歡歌我行雖難奈樂何

天津

玉帛都來萬國朝梯航南去接天遙千家市遠晨分集  
兩岸沙平夜退潮貢賦舊通滄海運星辰高象洛陽橋

河山四塞喉襟地重鎮還須擁使輶

夜過滄洲二絕

滄瀛直上海門深南北流來自古今  
牧馬尚談今日事買牛須見古人心

野涼溪樹晚蕭颼淺挂輕帆沂急流  
獨坐船牕清不睡聽風聽水過滄洲

弔顏魯公詞

平原之疆漢侯所邦慨叛孽之突起  
值唐廷之弗綱列

城失勢以風靡長途眯目而塵揚穴有首鼠輒無怒螳  
彼二十有四郡豈一士之可望乃有循吏出守忠臣作  
防旣炳見乎先幾復潛鋒於外攘練周兵於邱甸峙魯  
遂於芻糧方其開筵饗士灑涕沾裳威振虎豹氣吞豺  
狼屹砥柱之中立任奔流之湯湯破衆醜之心腹扼中  
原之喉吭隱犄角之交應與常山而爲雙當是時也飽  
宴安之醢毒嬰富貴之膏盲釁起褒姒禍延金張爭射  
利以賞國孰扶顛而救傷如公者狀貌不達於蔽旒足

跡不登於巖廊而乃身任國紀義存天常悲舉世之莫  
變信斯人之孔臧及乎姦相譎使強藩脇降年旣老而  
益壯辭不煩而愈昌指山河而誓死與日月而爭光稽  
往牒之具載想英風之未亡瞻廟貌之依邇恨束芻之  
莫將莽川陸之旣暮見高原兮蒼蒼

將至德州徐都憲仲山來迓是夜微雨

說旱談荒夜不眠曉來衝雨各開船不辭飄灑沾衣袂  
且愛依微入野田雲好不應風作祟路長真以日爲年



無端又屬淹留坐醉下蓬牕一黯然

次日大雨至夜喜而有作

打牕鳴雨喜來過坐聽歡呼雜擢歌沙口渡喧人語亂  
柁樓風急水聲多塵心散渴真消得農事雖宜奈晚何  
七十二泉雲霧裏可能流潤入官河

至安平鎮減水石壩有懷劉司馬長句

黃陵江頭河水黃衝沙走石聲礪琅北趨平原下廣澤  
直使運道無津梁坐令漕舟百萬若小壅賈船徒紛龐

帝遣臺臣出治水水性硤兀難爲降千金作塌萬夫力  
頃刻下墮輕毫芒臺臣焦思廢食寢夜夢神禹授以玉  
簡青琳琅水行在導不在障豈以水石爭濤龍地靈順  
軌水怪伏河遂南徙歸徐方因高爲陵下爲澤復有石  
壩磊磔長如岡豐功偉績不可以數計此乃餘力非求  
強憶昔文皇建都向燕薊中導汶泗通漕綱尚書朱公  
富經畧世上但識陳恭襄瑄武功徐公有貞何人亦奇  
士盛以勲績爲文章四十餘年復一決歎此之績安可

忘帝命儒臣分書刻金石此記正屬臣東陽使船東來  
一登眺風日颼爽炎天涼是時臺臣入兵省我在江湖  
思廟廊但願此岡不墮河不徙縱有帶礪無滄桑

過汶上訪思聖堂

東入齊魯疆始見聖跡存曰茲中都地宰此社與民大  
哉堪輿門何者非吾人平生轍環志且復先鄉鄰損也  
不宰費顧此逃權臣跡殊本同義於道諒有聞見賢且  
思齊希聖復何云徘徊古祠下感慨傷心神

望闕里

闕里分明聖域開魯邦遺趾豈蒿萊衣冠夾路清風引  
香帛盈門好雨來天外遠山皆拱護眼中新廟已崔嵬  
茲行合是平生事況有文章出上台

新廟告成事

巖巖岱岳新廟有作爰經爰度惟舊規是若載增載拓  
以光於前畧新廟旣構其輝孔昭如輻斯輳如越斯茂  
若繪若繡惟功之懋厥有加於舊惟天降災鬱攸是崇

惟斯文之恫惟帝降命有嚴厥工惟中丞之風監司之  
功廟祀俾俶帝命孔肅曰此大事我其可弗告棗牲冊  
祝言輔臣是屬臣拜稽首臣曷敢弗恪廟既新止禮既  
殷止聖靈降鑒饗吉蠲止天右斯文實享厥屯如貞斯  
元如冬斯春惟國有明祀於千萬年

右新廟五章一章六句二章七句一章八句  
一章十句

謁尼山廟有述

迢迢魯城路望望尼山峯

坤靈在其西

洞名

顏母山在

其東周原敞弘地中有文宣宮年深歲復改上雨兼旁  
風蒼黃設俎豆俯仰思儀容周旋入寢殿棟棟半已空  
丹青剝像貌暴露炎埃中因之起深痛感額面發紅荒  
苔臥石柱隱隱雙雕龍乃知前朝事規制本穹窿興替  
會有時闕里方尊崇紛紛縉黃輩各自傳其宗琳琳映  
貝閣勢若爭雌雄吾曹衣冠士此涕詎無從昨逢中臺  
彥

徐都憲  
盧侍郎

感舊傷遺踪惜哉不共到獨此心忡忡他時

按部後爲我迴青驄

謂顏廟

至德不世出所居必有鄰依依闕里東見此陋巷行天  
資本純粹況乃沾陶甄禮樂以爲邦克復以爲仁當時  
七十子此道鮮有聞行藏亦時可不道周公貧傷哉宣  
尼慟此涕復何人公封與廟配俎豆垂千春古祠久荒  
敝廢井尚未堙洄酌代明祀冷然洗心神舊第入環堵  
纓冠見雲孫因之訪孟廟鄒嶧東嶙峋遙瞻孔林在且

薦清溪蘋

曲阜紀事

天下衣冠仰聖門，舊邦風俗往來敦。一方烟火無菴觀，

本縣僧道不入境

三世絃歌有子孫。城郭已荒遺址在，書文半

滅古碑存憑誰更續。東遊記歸向中朝次第論。

謁孔林

墓古千年在林深，五月寒恩沾周雨露。儀識漢衣冠駐

蹕亭猶峙

宋真宗亭

巢枝鳥未安

世傳鳥雀不入林

斷碑深樹裏無



路可尋看

周廟

祀周公也

淤於庠薦於庭坐於廟堂孰使我冠裳兮或飽而飫或  
煖而舒或佚而娛孰安我起居兮孔道之傳兮周祀之  
綿兮魯封之存兮曷以不永年兮

右周廟三章章四句

謁少昊墓

古稱少昊氏云是五帝先冊典旣茫昧氏名僅流傳建

都魯城東遺址有軒轅至今高原上陵樹鬱成阡豐碑

不刻字遺恨宣和年

宋徽宗造碑甚鉅值金亂不果立

國朝重明祀香

帛隨纁玄

時制每三年一祭

我來訪舊跡幸未迷榛菅四顧林

莽間野意但蒼然停車問父老相對兩無言

### 會東池有懷東莊聖公

半簾斜日罷登樓夢醒重來是舊遊山雨尚含青竹暝  
水風先動碧河秋望重東嶽疑千里興比南溪欠一舟  
好事主人無在者十年心賞爲誰酬

過曲阜孔水道見壁上詩志痛一首

歎語清茶去復留  
敗牆殘墨重回頭  
無端又作春聲歎  
拭目西風兩淚秋

泛南池有懷南溪聖公

輕舟別浦路迢遙  
危石虛亭影動搖  
雲去好山爭入座  
雨來新水欲平橋  
多情畱客空杯酒  
舊事傷心但柳條  
今日我來還我去  
小山叢挫竟誰招

望嶽

偶上奎文閣來觀泰嶽峯半空翻碧浪平陸走蒼龍紫  
愛沾嵐濕青嶙嶸濃長源隨迤邐高樹助蒙茸幢節  
迎還送戈矛擊更衝烟霞變明晦雲雨驗豐凶混沌天  
初闢精靈地所鍾分疆書禹貢肇域紀堯封挹淺臨滄  
海憑虛揖華嵩行尊宜作太名重合稱宗外歛神無迹  
中涵德有容廟嚴王者象植古大夫松北闕身長繫東  
輶境暫逢崖躋愁月觀谷嘯想風從聖主勞心切儒臣  
樂事嘯饗食慙驛廩與從憫官慵歲旱當憂國民勞恐

病農我方頤一笏誰共手雙筇日月蹉跎易溪湖隔限  
重奮飛翰鳥翼飄泊信萍蹤濯日思晞髮凌秋憶盪胸  
酒闌多爽氣涼思脫惺鬆

祭尼山廟文

維弘治十七年歲次甲子五月庚寅朔越二日辛卯具  
官李東陽奉勅代告闕里廟庭成事之後恭謁尼山謹  
率中書舍人喬宗以牲醴香燭之奠昭告於先師大成  
至聖文宣王曰聖人之生必當貞元之運稟川岳之精

岱宗之麓有山曰尼洞曰神靈者吾夫子之所生也仰  
惟德合元化道存六經集羣聖之條理開萬事之太平  
者實吾人所賴以有成也薦享之禮報答之義達上下  
遠邇而無間者天下之同情也瞻我闕里有嚴廟庭屬  
重建之舉爲代告之行蓋統於專命而不敢以附託爲  
私榮也故踰三日之祭而不遠數十里之程辦香之獻  
少牢之薦亦惟以致愚誠也若乃幼而學壯而行爲子  
而孝爲臣而忠嚴出處之分慎始終之節以質於幽明

者方竊有志焉而懼未之能也萬冀聖靈其幸鑒之庶  
幾無負於心盟也謹告

祭南溪公文

維弘治十七年歲次甲子五月庚寅朔越三日壬辰具  
官恭奉李東陽欽奉朝命祭告於闕里聖廟越既竣事  
乃克以剛鬣柔毛庶饗之奠致祭於故衍聖公南溪先  
生親家之靈曰予昔弱歲與公同朝邈乎其未始接也  
粵自冰玉羅沈馬之好濟寧之邀竟回舟於興盡空命

駕於神交既而德卿陳提學惠我以柯伐東莊賦我以  
桃夭仰聖門之蔭澤挹令子之丰標書不越月望不崇  
朝公蓋嘗有意於予矣謂在潞水之瀕都越之郊及乎  
新廟有與我車載膏奉王言於綸綍戒邦禮於牲牢瞻  
宮牆而再拜歷庭館而同遨曾不幾時而公不我留也  
諒四美之難具嗟萬物之既凋知此事之非偶嗟吾生  
之不遭徒許心於挂劍猶戀德於綈袍已矣乎丹書玉  
節不可以久駐空痛哭而還驢嗚呼尚饗



祭東莊公文

前與公交義則鄰曲後與公親情則骨肉公實爲之豈  
必天屬新廟旣揚代祀孔肅中更歡戚屢變寒燠公實  
啟之天竟從欲我來何遲公去何速入公之筵不聞麋損  
坐公之庭不聆言笑默默蒼天悠悠九泉我來有期公  
不少延我之思公昔公之行贈有篇帙今公之沒葬有  
銘刻公性所嗜公心可質我之來思久願永畢公乎有  
知鑒我芬苾尚饗

代告闕里孔子廟記

弘治甲子春正月重建闕里孔子廟成蓋自己未夏六月以災告上既命學士臣李傑往告卽下山東巡撫巡按暨布政按察諸臣議重建焉前僉事臣李宗泗規畫畧定今僉事臣黃繡綜理周畢而巡撫都察院臣徐源實綜之輪奐閎偉髹繪輝赫皆加於舊而告成事者臣源及監察御史臣陳隣也事下禮部尚書臣張昇等以爲是數百年之曠典請加崇建以昭示天下上親製碑

文祝詞命太常具香帛有司備品物卜曰御正殿傳制  
特遣臣東陽自內閣行祭告禮會有孝肅太皇太后之  
喪既釋服卒哭上未忍悉從吉典乃避殿賜勅以行臣  
東陽奉命惟謹以閏四月丁卯陞辭祭未至於廟時臣  
源實方返於境衍聖公臣孔聞韶方在父喪聞命跣蹣  
易服返於郊曲阜知縣臣孔彥士扶疾返於驛甲申遂  
致齋越三日丁亥乃祭中書舍人臣喬宗亦奉命有事  
於廟右通政臣韓鼎以督河至御史臣陸儼以巡撫至

臣盧瑄以清軍至左布政使臣曹元按察使戈瑄署都  
指揮僉事臣申寧以三司長至左叅議臣冒政以分守  
至僉事臣袁經以分巡至副使臣陳鎬以提學至而臣  
繡同在皆陪位分獻東哲則臣宗西哲則臣元東西廡  
則五經博士臣顏公鉉臣孟元啟聖王殿則三世學錄  
臣孔公璜孔氏之族無遠近小大來會者以數百計前  
日時雨連降及期而霽禮成之後星月朗耀神人歡暢  
歌工舞佾奉器執事之臣下逮胥隸僕從皆欣欣然如

雲之從風水之赴壑有不令而集者臣東陽乃退而歎  
曰於戲人性之善惡豈不信哉夫自情蕩性鑿之後雖  
積歲累月嚴刑峻法以驅之使入於聖賢之域而不可  
得也及乎入聖人之鄉觀聖人之所爲居接其子孫族  
姓見其禮聞其樂而以想像其形容卒然之間怠心與  
躁心釋而不自覺蓋凡卑且賤者皆然而大夫士之貴  
而賢者不待論也然則天理之在人心者曷嘗一日而  
忘哉聖人之教固因其所明而導之使復其性而吾夫

子之刪述六經垂法萬世其功所以爲大不可一日而忘者也且褒崇之典雖於聖人無所加損而與世道常相爲重輕故大牢之祀肇開漢業宸拜之禮宋道興焉我國朝太祖高皇帝封爵奉祀建學置官逮我獻宗純皇帝增樂舞八佾籩豆十二天子之禮至是始備重熙累洽蓋有由然聖天子登極視學以來益加崇重是役也至集天下之財聚數年之力又輟論思輔導之職詔旨諄切禮意深厚出乎常格所以視天下德意指其向

方一轉移振作間而應者固若是速也夫明乎祭之義則可以治國使天下知孔子之當祭則知其道之當行為臣必忠子必孝無不復其性者擴其端而充之將不自今日始乎臣不佞敢紀成事以告來世若闡揚道德以彰教化則金章宸翰昭如日星有目者所得共覩臣曷敢贊一詞哉榮祿大夫太子太保戶部尚書謹身殿大學士知制誥經筵史官會典總裁臣李東陽拜手稽首謹記

重建孔子闕里廟圖序

闕里孔廟之重建也其經費所出爲竹木之稅舟船之稅麥絲之稅及公帑之藏其名物之籍木則市之楚蜀諸境石則取之鄒泗諸山瓦甃鉛鐵則官爲之陶冶丹堊髹漆則集之於商斲削搏裁雕琢繪飾之工則徵之京畿及藩府之良者而夫役則雇之民間而官予之直若食焉巡撫之官始則都御史何公鑑巡按若御史高君宗熙布政若王君沂按察則陳君璧督工之官則叅



議程君愈僉事李君宗泗其後皆更代不恒至都御史  
徐公源御史陳君璘僉事黃君繡而以成告廟之制中  
爲大成殿十楹崇八丈邃有奇廣倍其半爲左右廡百  
餘楹後爲寢殿八楹前爲告壇又前爲奎文閣楹視寢  
數崇畧與殿等又前爲門四重中爲橋三殿之左爲家  
廟後爲神厨前爲詩禮堂爲神庫又前爲燕申門殿之  
右爲啟聖王殿後爲寢前爲金絲堂又前爲啟聖門前  
左右爲齋室室之外爲快觀仰瞻二門與觀德毓粹二

門而四又左右爲鐘鼓樓與角樓而六閣之前後爲碑亭各四前四亭則本朝御製而祝勅諸文皆附焉惟壇及樓及中門仍舊其餘或創或葺並從新制材幹堅厚構締完整象設端偉繪飾華煥悉臻其極蓋一代之盛典天下之大觀皆備於此是李君所經畫而黃君實成之工始於弘治庚申之二月落成於甲子之正月始建之命行公聞韶已嗣爵御史陸君儼盧君翊及布政曹君元按察郭君瑄等皆來會齋祭既畢達觀於新廟東

陽乃前揖徐公曰是惟都憲之賢令行事集以成此功也又揖董君而前曰是惟僉憲之達於政勤於所事夙夜匪懈以成此功也皆孫弗敢居又揖衍聖公而進之曰是惟先師道德之深澤聖天子崇儒重道之盛心更新圖遠方始自今日而式克成之尚慎守祇奉以無負於吾君無忝於爾所生也聞韶曰敢不於斯言是圖東陽旣紀祀事黃君將爲廟圖別勒於石以示久遠因復爲序之而藩憲郡縣及凡有事於廟者則書其名氏於

後云

詩禮堂銘

有序

闕里孔廟之東有詩禮堂蓋舊名也按察黃君繡重建  
茲廟嘗聞故行聖公弘泰言金章宗謁廟時爲行幄以  
駐蹕比去有司請撤之章宗示留孔氏爲延賓齋遂止  
勿撤近燬於火今移而東數武許加崇廣焉因爲銘以  
遺衍聖公間韶俾識之銘曰惟孔有庭聖訓攸在父立  
子過其徒是賴其訓維何維詩及禮手所刪定教自家

始聖不可作庭名固存萬世是師矧惟子孫有齋延賓  
金所駐蹕在昔有然矧我今日新廟旣闢斯堂亦遷有  
來繩繩世守勿愆

金絲堂銘

有序

金絲堂舊在孔廟左廡之東東直井前直詩禮堂嘗掘  
地得石刻知爲孔子故宅蓋世所傳魯共王聞金石絲  
竹之聲者也故歷代之樂器藏於其間比者廟燬而堂  
獨存新廟之闢堂地皆入左廡金絲則移轉而西與詩

禮堂正相直東旣各爲篆額復爲銘金絲之銘曰惟孔  
有宅曰維聖門魯共何人欲壞更存維壁有書四代之  
文維堂有聲八音是聞此事茫昧書則真有有堂載新  
宅固其舊聞樂知德斯言已久金絲在焉名不可朽昔  
堂在東今堂則西欲究厥初視我銘詞

悼手植檜次匏庵先生韻

孔庭盡烈火廟貌倏更新嗟哉古檜燬僅見孤根存槎  
岨橫高堂突兀撐重門禮記嘗及漢官封未污秦所貴

手親植不與萬木羣翻會衆芳茂翁鬱如雲屯枯茲發  
餘燼往代有遺文

晉永嘉三年枯死隋義帝元年復生  
唐乾封三年枯死宋康定元年復生

旦夕或可期今古何當分雷聲久絕響五月始一聞矧  
茲時雨降遠邇皆覃均仰高復好古一日累數巡發育  
豈無地栽培方有人何年重彌蓋翹首看嶙峋

題袁僉事松壑圖卷

高松盤拏如攫雲哀壑動地空中聞秋聲怒呼夜濤湧  
勢若萬馬驅千軍陰風蕭蕭山鬼泣水底長鯨作人立

老子橫揮似有神紛紛畫史何嗟及東臺鐵冠金石腸  
攜來兩袖皆風霜官船五月不知暑擲筆停杯聽山雨

題袁僉事石田山水卷

偶逢湖南客却話江東路笑指畫中山知是乘驄處

題徐都憲水村竹屋卷

藹藹水中村灑灑屋上竹塵居遠城市屣脫去塵俗朝  
看碧山爽夕看晴波淥江湖有襟帶冠履無拘束昔聞  
東吳老本出南州族封非渭川戶乞豈江湖曲溪山舊



業在圖史清風續華躋歷臺省雅尚在陵谷夢寐三十年此封還此屋官塗復傾蓋佳話時秉燭指點入丹青依稀過江麓感今復懷舊歲月如轉轂倘遂江湖遊鄰哉我當卜

題徐都憲椒園茅屋卷

南園種椒椒實紅中堂覆茅茅葉重疎香細影入簾戶千樹萬樹皆春風堂前不種閒花草祇愛椒花得春早庭檜應同手植成江桺枉被風吹倒人家何獨無此堂

豈有喬木參天長願君朝葺堂茅夜灌樹長記先翁醉  
遊處

過天津聞京師大雨

水急知山雨天昏識海雲寵開青草色歡動白鷗羣露  
禱心須應平安報屢聞向來家國念聊與慰憂勤

鄒縣祭蒙泉翁外舅文

維弘治十七年歲次甲子五月庚子朔越二十一日庚  
戌具官門生李東陽代告闕里歸過鄒縣謹以瓣香斗

酒之莫遙祭於我外舅蒙泉先生岳公之墓曰公之進  
退惟道升降公之存亡惟世重輕四海之外百年之內  
孰不知所謂蒙泉先生也東陽夙自髫髻非獲瞻門庭遇  
我以國士賓我以館甥道義之感文章之記其在天下  
者非一人之私情也然而生不侍於膝死不送於塋心  
許於南都之使天留於闕里之行當是時也公女旣折  
吾子亦傾慨萬世之更變傷二姓之凋零痛通家之骨  
肉想不死之精英顧官階祿秩已過公之倍蓰而風節

勲業曾不及公之畸羸不勇退以奇脫猶蹈常而守經  
此難與世俗者道將永質於幽冥杳佳城之莫卽終飲  
淚而吞聲

歸至張家灣舟中作

使節南行又北旋眼中風物轉堪憐麥苗枯盡初逢雨  
河水重來始放船野哭時時聞斷殺山通處處起顛連  
燈明月暗蓬牕底細寫封章達九天

復命題本

題爲公務事先因闕里孔廟落成該禮部題奉勅遣臣  
前往祭告續該臣題准令中書舍人喬宗前往恭寫御  
製碑文并遣祭祝文上石等因臣欽遵弘治十七年閏  
四月初七日起程本月二十三日前到闕里致齋二十  
七日行祭告禮隨即督令奏帶文思院副使閻傑鐫刻  
碑石各已完備五月初六日該巡捕都察院徐源督工  
按察使僉事黃繡等樹立訖臣看得所建廟宇規制閎  
偉工作精緻而金章睿藻大書深刻誠千年之曠典一

代之偉觀足以上妥聖靈光昭儒道傳之後世永永無窮臣事畢之日遵奉勅旨星馳回京復命除將前項御製文字各一通摹搨前來另行裝演進呈外緣係奉勅公務事理謹具題知弘治十七年五月二十六日

通達下情題本

題爲通達下情事臣備員內閣叨任腹心左右輔導乃其常職比者欽承使命遠涉川陸有所聞見不敢緘默謹披肝瀝膽爲陛下言之臣自閏四月以來經過裏河

天津一帶適遇天時亢旱風霾屢作夏麥枯死秋田未種運舟不至客船稀少曳纜之夫身無完衣荷鋤之命面有菜色極目四望可爲寒心臨清安平等處盜賊縱橫殺人劫財者在在而是傳聞青州劫奪尤甚各該地方官員隨捕隨發各處回賊百十成羣白晝公行出沒無忌又聞南來人言淮揚各府十分狼狽或掘食死人或賤賣生口流移搶掠各自逃生運糧官軍搬壩剝淺艱辛萬倍人心惶惶莫知所措以至江浙浙東荒歉之

地方數千里朝廷雖差官賑濟減耗折糧折東補西得不償失且民戶消耗軍伍空虛官庫無旬月之儲俸糧有累年之欠夫以東南財賦所出一歲之荒已至於此北地貧薄素無積累今秋再歉則將何以堪之國家承平富庶百有餘年一時之荒尚不堪處設有不測又將何以處之言及於斯可爲痛哭臣本愚庸生長都邑曩於成化年間省祭原籍公幹南京再經此地始知民生愁苦之狀州縣凋敝之由以今校昔十倍於前則臣雖



久處官曹日理章疏猶有不得其詳者仰惟陛下聰明  
聖知卓冠羣倫而居於九重之上深宮之內小臣百執  
事知之不敢言言之不敢盡細微幽隱之故豈得而盡  
聞之又豈得而盡信之哉臣嘗訪之道路詢之官吏皆  
言糧草稅課歲有常額而冗食大衆國用無經差役頻  
繁科派重疊木植顏料百凡之物歲無虛月內廩錢糧  
交納使用更無紀極京城修造前後相仍做工軍士累  
力陪錢每遇班操寧死不赴勢家巨室田連州縣徵科

過度請乞無厭親王之國供億之費每至二三十萬修  
齋挂袍開山取礦作無益以害有益者間復有之加以  
貪官酷吏肆虐爲姦民力困窮嗟怨交作天災迭降固  
有由然他如遊手之徒號稱至親名因附搭鹽船聲言  
各處馬頭起蓋店房網羅商稅國家建都於北仰給南  
方商賈驚疑大非細故織造內官縱使羣小採打閘河  
官吏趕捉買賣民居騷擾動地又臣所目擊者在塗如  
此在彼可知若此之類未易枚舉臣聞天下之患常在

於上下之情不通今閭閻之情郡縣不得而知也郡縣之情廟堂不得而知也廟堂之情九重不得而盡知也是皆起於容隱成於蒙蔽容隱之端其禍甚小而蒙蔽之禍甚深大壞極弊皆由於此臣既盡知而不盡言恐陛下終不得而知也臣竊以爲今日之生民疲敝已深而國用之匱乏已極若事事而蠲之則不可盡免時時而給之則不可勝給臣請以所見喻之節用度如閼河然節一分則上有一分之益廣儲蓄如源泉然積一分

則下有一分之利惟在聖心一轉移之間而已臣在山東伏聞陛下以災異屢見戒飭羣臣痛加修省特降綸音令內外各衙門開查弊政遠近歡動稱頌聖明以爲太平之幾端在於此臣竊念往時詔旨頒降章疏畢陳而事關內府貴戚每爲掣肘如去年內戶部等衙門後府等衙門今年兵部等衙門會奏事件及吏兵二部查奏傳奉乞恩各一本皆經時累歲不賜施行臣恐今次所開又成故紙如聖諭所謂虛應故事者則民情何時

而慰天變何時而彌乎伏望陛下廓離照之明奮乾綱之斷查照前項節次奏本催督今次開具事情凡民情時弊有當興當革者詳加採擇期在必行乞望躬行節儉力省浮費惜無名之官賞停無益之工作以先天下以慰生民則變歎成豐轉災爲福可以延宗社萬萬年之休矣臣變理無狀匡輔罔功凡臣所陳弊政皆臣之責除另行具奏辭避外今將通達下情謹題請旨弘治十七年五月二十六日奏聖旨卿所言深切時弊足見

憂國至意事當施行的著各衙門查議明白開具來說  
欽此

紀行雜志

弘治甲子四月丁卯陞辭奉勅賜酒饌而行部院諸公  
卿餞於崇文門外同年諸公又送於大通橋東館閣諸  
先生餞於三忠祠府寺諸卿丞又餞於前至深溝諸門  
人官屬暨諸鄉舊分餞於廣惠寺癸丑諸門生餞於糕  
米店時中書舍人喬生宗亦奉旨有事於廟其弟太常

少卿宗暨諸故舊偕餞於前而諸親尤厚者又餞而前  
乃別暮至張家灣巡撫山東都御史徐公源已遣舟來  
迎宿於舟中戊辰大風午始定乃放舟夜至灤縣已已  
過和合驛看郎中良輔張主事邦瑞來迓夜至河西務  
庚午過楊村驛得風行至暮風橫行尚未至丁字沽數  
里遂野泊至辛未兵備施副使槃來迓過天津又與商  
張舟送過楊青驛夜過靜海縣壬申過流河驛又過青  
縣都御史王公沂遣人自真定來迓又過興濟縣趙主

事名鶴張主事名天相來迓夜過滄州巡鹽王御史愷  
來會癸酉過磚河驛又過新橋驛夜過族兄訓導經甲  
戌過連窩驛又過良店驛孔知縣華公自寧津來會清  
軍盧御史翊崔叅政巖皆來迓是夜徐都憲來迓遂同  
舟達旦乙亥微雨旋復霽毛叅議珪楊僉事壽皆來迓  
過德州巡按陸御史爾以書來迓漕運都御史張公縉  
都督郭公鉉皆遣人自淮安來迓又過故城縣馬缺  
中錫方家居會於舟中錢御醫宗甫先寓京師予延諸



關里視故衍聖公南溪先生疾至已弗瘳歸留故域予  
訪之不及見而去丙子過甲馬營驛大雨過武城縣又  
過渡口驛兵備李副使善守備劉都指揮金方郎中璘  
王主事鉉徐主事璉童主事器王主事納誨及鎮守臨  
清朱大監雲皆冒雨來迓喜甚謂自春以來未見此雨  
丁丑晚至臨清史郎中學夏主事昇吳進士便次第來  
會李知府舉曹通判鏌皆來迓是日得江編修俊檢討  
偉書戊寅過東昌至魏家灣聞管河通政使韓公鼎及

袁僉事經皆來迓已卯過安平鎮登減水石壩觀往歲  
奉勅所撰記石刻項郎中甘明林進士廷皆來會是夜  
宿安山驛因與韓通政談南旺湖水淺運舟泊塞不得  
進乃決議陸行庚辰過東平州進訪帝堯墓墓在州城  
東北二十里及冉子墓在東十里皆遠弗能至過新橋  
驛宿汶上縣訪思聖堂蓋中地宣聖所爲宰故名有元  
人記石刻喬中書舍人搨之聞有王彥章祠不及赴是  
日提學陳副使鎬修廟黃僉事繡次第奉迓辛巳過新

嘉驛關里司樂典籍管勾來迓曲阜孔知縣彥士道得疾不及見冒叅政政及衍聖公聞韶先迓至濟寧弗值至是皆來迓夜宿兗州府壬午朝魯府賜饌於承運門設樂辭簪花又辭東門郡王鄒平王長子遣人請見皆辭不赴癸未孔氏學錄公璜顏博士公鉉孟博士元畢主事昭次第來迓晨至關里雨衍聖公方在父喪易服率族人及顏孟子孫迎香帛祝文於三里鋪行五拜禮遂前導至於奎文閣禮如初因謁宣廟巡撫巡按清軍

及三司府縣學官諸生皆陪位出會於詩禮堂宿於南  
池先是李御史良以書自淮楊來迓不值留書而去甲  
申遍觀廟宇皆新構窮極壯麗共致瞻羨觀魏漢以來  
諸碑刻半已剝落前後古木數百株猶森聳如故觀手  
植檜已燬枯根可二三丈相與歎惋久之是夜遂致齋  
乙酉觀書御製碑文字可一寸殊整健韓通政來會遂  
登奎文閣望泰山及尼防鳧驛諸山丙戌雨習儀於詩  
禮堂遂省牲丁亥行祭告禮齋中書宗分獻東哲曹布

政元獻西哲顏博士鉉獻東廡孟博士元獻西廡孔學  
錄公璜獻啟聖王殿是夜雨霽禮成月東出衆情忻懌  
是日會宴於詩禮堂不用樂戊子徐都憲率衆請紀祀  
事致幣却之謁顏子廟見其傾圯大甚歎惋久之觀顏  
井相傳爲陋巷舊址今有亭存焉出訪顏博士家比謁  
孔林拜瞻三世墓莫能辨方向上各有石碣大字宋所  
立也因西過南溪東莊二聖公新墓哭焉歸謁周公廟  
頗闕麗亦黃僉事所建也巡撫而下皆陪位是日宴衍

聖公府孔學錄代行酒已丑則韓通政曹布政戈按察  
申都事皆辭去徐都憲會於公館夜會於東莊公子聞  
詩家五月庚寅朔謁廟過曲阜縣訪孔知縣彥士族長  
希瑾輩至承泗宅見先所題壁慟哭而返陸盧二御  
史會於東池辛卯謁尼山聖廟行釋菜禮喬中書袁僉  
氏陪位衍聖公及其弟聞詩聞禮聞善皆從見殿宇敞  
陋寢殿尤圯塑像皆暴露風日中因憶舊歲兗州嘗求  
修廟記而壞弛如此悵恨不能置遂訪坤靈洞深不過

數尺求宋楊奐東遊記所載石床石枕者無有也過顏  
母山衍聖公往登焉歸言酌聖井水甚清冽宿其新莊  
望孟子廟及嶧山遠不能赴壬辰歸闕里祭南溪公晚  
祭東莊公與其諸子哭盡哀是日陸盧二御史皆辭去  
癸巳將謁廟辭徐都憲及黃僉事來告碑刻將完卜以  
己未立於新廟請畱觀之是日陳副使辭去始議修闕  
里志林主事文煥來見甲午端陽節廟祭來致昨孔氏  
請遊南池以朝廷免宴辭不赴乙未觀立御製碑畢事

而雨會於詩禮堂是日徐都憲率衆來致賀幣却之內  
申戒行雨復作黃僉事請作廟圖序不果行徐都憲等  
約遊泰山以朝廷尚在哀戚不敢赴丁酉廟以仲夏時  
祭來致胙徐都憲等餞於詩禮堂復致幣又却之戊戌  
雨謁廟辭徐都憲等邀觀達泉即左傳所載者岸有石  
石刻二大字因過孔承貴竹園園內有新泉及濯纓泉  
鉅竹萬竿高下曲折水聲瀾瀾出蒙翳間蓋孔氏一勝  
地也歸衍聖公餞於家己亥雨平旦不止遂啓行徐都



憲等餞於三里舖及已乃霽過兗州不入魯王遣長史  
來邀重會辭不赴暮至濟寧孔公翰聞京師閏月丁丑  
雨蓋乙亥奉旨祈雨三日而應林主事送過長溝龍員  
外霓來見韓通政復自張秋來迓南旺水淺不可行至  
是汶水至加一尺許夜至開河驛辛丑衍聖公送至安  
山驛乃辭去徐都憲袁僉事復自東平來會是夜至安  
平鎮壬寅會韓通政公鉉遂行晡又雨夜過東昌癸卯  
過臨清徐都憲朱大監等會於公館却花及樂甲辰王

徐董王四主事及李副使送至渡口驛夜過故城馬都  
憲及錢御醫會於舟中是日聞劉謝二公謝位不允聞  
尚書某公鍾致仕乙巳冒叅政黃僉事送至德州陸盧  
二侍御及二司遣學官來致書請修闕里志徐都憲韓  
通政袁僉事送至良店驛盡境而別得南屏潘公辰及  
族子嘉敬書夜風雨驟至宿連窩驛是日間提學陳御  
史在霸州丙午黎御史鳳見於舟中夜過興濟縣丁未  
過流河驛訓導族兄復來會得崔生傑書夜過靜海縣

戊申過天津衛至丁字沽始得水夜宿楊村驛己酉聞  
京師大雨商郎中鍾主事送過河西務是日聞陳御史  
擢浙江提學副司使已赴京矣庚戌過灤縣欲謁外舅  
蒙泉岳公墓以道濘不果遣劉主簿釗致祝文香燭辛  
亥宿張家灣趙主事復來會壬子過通州李員外金輩  
來迓過深溝諸親舊次第來迓至京宿西朝房癸丑劉  
謝二公會於朝房甲寅復命賜酒饌如初丙辰遣內官  
賜羊酒寶鈔

代襲封衍聖公謝恩表

孔子六十二代孫襲封衍聖公臣孔聞韶弘治十六年  
九月初六日欽奉恩命襲封衍聖公爵臣聞韶誠惶誠  
恐稽首頓首上言伏以道崇先覺褒揚每荷於朝廷禮  
正人宗封爵竟歸於世胄仰值右文之盛俯慚接武之  
難負重奚堪臨深莫喻茲蓋伏遇皇帝陛下天衷純粹  
聖學淵微紹惟精惟一之心傳守不愆不忘之古訓隆  
師重傳窮六經制作之原崇德象賢具百代彝章之美

粵自前漢肇牲牢之祀後周極茅土之封建及本朝益  
增舊典銀章玉帶班超一品之階左羽右千祭備八佾  
之舞以至分田賜第建學設官朝則豐館餼之儀代則  
謹承傳之序弟兄繼命事同宋世之蒙虛父子沾恩光  
編魯山之喬梓矧廟貌方新之日正車書大會之辰臣  
聞韶早廁饗宮麤通章句執籩豆以行禮樂非曰能之  
竭忠孝以事君親是所願也伏冀皇風雍穆至治馨香  
岱視三公世世居東而享德嵩呼萬歲年年拱北以來

朝臣無任瞻天仰聖激切屏營之至謹奏表稱謝以聞  
代衍聖公謝修廟遣祭表

具官臣孔聞韶欽蒙聖恩命工重建闕里祖廟及御製  
碑文遣官祭告謹率族人孔訶等上表稱謝者臣聞韶  
誠惶誠恐稽首頓首上言伏以禮必積百年而後興事  
有曠百世而始見是蓋政闕治體好本民彝凡在斯文  
式均慶戴若乃餘波剩澤沾被子孫其視常情曷啻百  
倍竊惟闕里祖廟肇自前朝列聖以來累加修葺比歲

鬱攸示戒煨燼無遺伏遇皇帝陛下天啟聖衷道符先  
揆顧宮牆之舊地實海宇之具瞻爰勅有司重加修建  
集四方之公帑閱五載之程期材幹堅良工製精密廟  
貌嚴整輪奐偉然既不替於前規復恢張於新制足以  
妥靈昭佑崇德報功極天下之大觀亘古今而不再者  
也又有奎章睿藻降自重霄名刻金書垂之萬代出容  
臺之香幣備郡邑之采犧特遣重臣遠稱殷禮衣冠畢  
集宅里增輝臣聞韶甫襲官封方膺服制念君命重於

家事而祖廟尊於父喪易服以迎拜天顏而敢後趨朝  
而謝率族姓以階行伏願聖學緝熙儒風丕振家詩書  
而戶禮樂益弘世道之光天日月而地山川永賁人文  
之化徒深祝頌曷罄名言臣下情無任瞻天仰聖激切  
屏營之至謹奉表稱謝以聞

南溪賦

西涯子寓於南溪之上公事旣竣賓客旣散清飈徐來  
旭日始旦春服漸成烏紗微岸方衆景之駢列忽羣憂




之一絆沿堤而步則蒼蘚繡地丹櫻燒林野食呦鹿園  
鳴變禽繁華曜其陽叢篠蔭其陰松移徂徠之峯石出  
大湖之潯境已曠而復幽路將窮而轉深乘舟而泛則  
泓碧長曳汰痕圓暈虛亭倒影下入無朕菱穿符繞條  
遠疑近飛羽夾翔游鱗作陣俯空鑑以窺明激輕清而  
拂潤雖非浮海之大觀亦得風雪之真韻登城而眺則  
面引鳬嶧背負岱宗左拱尼阜之巉巖右瞻文廟之寵  
聳古泗北枕清沂南帶達泉出乎其側汶水縈乎其外

深池曲竇下與溪會復有平疇萬畝大澤千里高原隱  
伏廣路長迤天冪冪以四布雲飛飛其如馭思兩儀之  
既闢見萬象之流峙乾坤渺其無際靈氣宛其攸止不  
然則一溪兮幾何吾寧獨羨乎此偶遇孔氏之父老過  
而問曰美哉溪乎其源可得而知乎父老曰此周封之  
遺墟漢國之故地也其前則兩觀之門其後則靈光之  
基也地以人勝事隨代更逮我故公而南溪是名滲漉  
污濁沉停清泠塞者疏而爲通涸者瀦而爲盈防危有

隄臨深有凭培舊植以爲堅綴新葩以爲榮斯溪也乃  
冠裳之所咸集軒冕之所必經詞林侈以爲盛事海內  
想聞其風聲矧伯仲之具美與東莊而並稱余嘗覽劉  
遊燕檣吳纜楚忽使輶之東邁弭余節兮鄒魯魯之山  
兮嶽峙魯之水兮漣漪匪王事之在躬余胡爲兮此溪  
窺聖途之浩蕩望學海之津涯歎時乎之不再觀逝者  
之如斯惟德澤之汪濊配宮牆之崔巍家與國而咸休  
名與諫而俱重吾固知金石之足恃託文章以爲期於

是衍聖公揖而進曰嗚呼此先君子之志也先生幸爲  
我賦之余曰嘻有是哉乃呼墨援筆書於堂壁徘徊日  
夕蓋三宿而後出也



懷麓堂集卷九十六

欽定四庫全書

集部

懷麓堂集卷

九十七至一百

詳校官監察御史

臣范表

中書

臣劉源溥覆勘

總校官編修

臣

王燕緒

校對官中書

臣

宋枋遠

謄錄監生

臣

葉中桂

欽定四庫全書

懷麓堂集卷九十七

明 李東陽 撰

文續稿七

集句錄

送徐學士先生之南京

迢遞山河擁兩京  
儒門弭節下蓬瀛  
文章宇宙千年事  
江漢風流萬古情  
才似茂陵非晚遇  
帝於京兆最知名

欲知別後相思夢幾度朝回一字行

病起飲鳴治小樓奉謝二首

大向交游萬事慵眼看春盡不相逢爾家最近魁三象  
我病猶堪醕一鍾賓館有魚留客久韶光隨酒著人濃  
若為化作身千億一月看花到幾峯

閉門空賦子虛成第宅清閒且獨行休怪兒童延俗客  
不勞鐘鼓報新晴定知何遜緣聯句始覺僧繇浪得名  
藥裏關心詩總廢不妨還校有心情



鳴治集杜句見答因再集杜二首

柴門空閑鎖松筠錦里逢迎有主人老去詩篇渾漫興  
晚來幽獨恐傷神自知白髮非春事何用浮名絆此身

戲假霜威促山簡病從深酌道吾真

夏日邀師召同飲屢  
促始至殊有難色

臥病江湖春復生空山獨夜旅魂驚欲知世掌絲綸美  
肯信吾兼吏隱名佩劍衝星聊暫拔殘樽下馬復同傾  
久爲野客尋幽慣實少銀鞍傍險行

師召南樓別後頗以不得詩為憾別贈杜句一首

百年多病獨登臺懷抱何時得好開縱飲欲謀良夜醉  
殊方又喜故人來舊來好事今能否恐失佳期後命催  
傳語風光共流轉須成一醉習池回

鳴治得詩再集杜并集鄙句各一絕依例共得  
八首

竹裏行厨洗玉盤誰家數去酒杯寬謝安不倦登臨費  
乘興還來看藥欄

即事非今亦非古更覺良工心獨苦不薄今人愛古人

此道今人棄如土

不覺前賢畏後生才微歲晚尚虛名別裁僞體觀風雅  
轉見千秋萬古情

午時起坐自天明客至從嗔不出迎誰道朝來不作意  
花枝照眼句還成

右集杜

睡起昏昏學病眠眼看風景入新年此心自信齊明久  
星在明河月在天

四壁圖書畫舫如年光如夢此驅除不才豈是官無事  
敢謂明時獨負予

庭雪初乾不受塵誰家池館愛逢新相逢欲問江南信  
夢入池塘都是春

兩日支持不出門朝來消息喜猶真無端世事論難盡  
到得春來一樣新

右集謝

四川屢有一樽之約病起集杜句奉詒

錦纜牙檣起白鷗何時更得曲江遊乘舟取醉非難事  
送客逢春可自由念我能書數字至似君須向古人求  
習池未覺風流盡許坐曾軒數散愁

同年會不赴集句奉諸年兄二首

射宮圍棘斷經過三捷東堂摠漢科拜舞盡隨仙仗入  
飛騰無奈故人何山呼聖壽烟霞動雲擁蓬萊雨露多  
二十年前同日喜幾時回首一高歌

井轄投多思不禁銀臺金闕靜沉沉共言東閣招賢地

空作西州擁鼻吟登第往年同座主抱琴何處覓知音  
空懷遠道無持贈霄漢常懸捧日心

鼎儀同約止詩舉張汝弼吳元啟舊例以隻雞  
斗酒為罰科數日後必有縛雞載酒而至者閱  
月不見又不敢公言相督集唐句以諗之不敢  
厚有所望得一和章足矣二月十日

多情長是惜年華二月中旬已破瓜漫說簡書催物促  
莫將文譽作生涯疎簷看織蛸蟪蛄網遠信聞封豸寇花

閒說攜琴兼載酒馬蹄今去入誰家

東數五侍講

曲江院裏題名處遙想風流第一人四海交遊更聚散  
十年京洛共風塵未央樹色春中見茂苑鶯聲雨後新  
試問登高能賦客思情誰是舊雷陳

自鳴治外屢有投贈而和章不至試語明仲即  
躍然而起此非相負者集唐句以啟之

漢宮題樹憶仙郎共汝朝天會栢梁謝朓每篇堪諷詠

揚雄託諫在文章春浮玉藻寒波落水滴銅龍晝漏長  
自有神仙鳴鳳曲不將清瑟理霓裳

明仲和章至謂不宜獨以險韻相困因索再和

一首

幾宿春山共陸郎飛飛輕蓋指河梁青雲舊路通仙掖  
草色新年發建章身外虛名將底用愁來一日即爲長  
簷前春色應須惜昨夜新裁白翠裳

周侍講伯常聞予止詩作長句見督開戒因集



唐句奉答之

北闕晴雲捧紫闥，洞門高閣藹餘輝。  
郎中官貴施行馬，構殿談餘舊賜衣。  
載筆已齊周右史，何人敢和謝玄暉。  
楊花榆莢無才思，已分將身著地飛。

送羅裡仲紹興教授

裡仲明仲之弟餘杭教諭之子也

輦下惟因憶弟兄，何時開閣引諸生。  
雲連海氣琴書潤，日射螭頭劔佩明。  
好是五賢嘉賞地，府學教授一訓導四故稱五賢早知三禮甲科名。  
餘杭溪上扁舟好，猶是孤帆一日程。

伯常因用前韻憶亡弟以予方抱此戚因以見  
遣再疊前韻一首

紫界宮牆白板扉碧牕斜日藹春輝陽和本是烟霄曲  
歌舞空栽雪夜衣畫省香爐違伏枕荒山野水帶斜暉  
遙知兄弟登高處却望衡陽少鴈飛

和鼎儀漫興見寄韻

攜手城南歷舊遊江南江北路悠悠青山只憶招提境  
白雪多隨漢水流絳簡尚參黃紙按清言遠待玉人酬

春風無限瀟灑意宋玉無愁也自愁

春日答舜咨

竹牕幽戶有佳期日暖風恬種藥時  
自歎馬卿常帶病也知光祿最能詩  
晨搖玉珮起金殿晚拂爐烟上赤墀  
聞道仙郎歌白雪萬家同唱郢中詞

亨父集句索藥奉和一首

多少分曹掌舊文不知何事久離羣  
江淹彩筆空題恨荀令香爐可待熏  
佳節屢從愁裏過遇書忽向病中聞

崆峒別有長生訣不惜千金借與君

清明送曰川數五陪祀長景二陵

長安雪後見歸鴻暮節登臨且喜同宮怨柳營烟漠漠  
馬嘶山店雨濛濛漢家宮闕疑天上武帝旌旗在眼中  
日暮長隄更回首自西流水盡朝東

雪不止再集一首懷二公山行之苦

海門寒日淡無輝雪入春分省見稀無酒誰供陶令醉  
祀陵先濟戒  
有情應濕謝莊衣殿前玉女移香案階下  
一日故云

奚官掃翠微寂寞江天雲霧裏行人獨向五陵歸

雨雪連日曰川數五怪余詩有柳營山店之句  
歸途幸晴富有倡和凡贈行者皆答獨不及予  
再集一首奉謝并索和章

雨過風雷遠石壇晴明依舊滿長安時人不識予心樂  
且道無憂行路難小院回廊春寂寂北湖南澗水漫漫  
翰林風月三千首不得當時一字看

清明後二日與鳴治約訪王仁輔於天德觀阻

雨寄鳴治

清明幾處有新烟  
獨向簷牀看雨眠  
忽有好詩生眼底  
暫留歡賞寄春前  
壺觴須就陶彭澤  
伴直難呼孟浩然  
何用別尋方外去  
庾家樓在斗牛邊

送涇源趙判官致仕後歸自京師

紅亭綠酒送君還  
五柳先生本在山  
已喜皇威清海岱  
又勞行役出秦關  
川原繚繞浮雲外  
樓閣參差紫氣間  
聖代逍遙更何事  
睡烟歌月老潺湲

師召邀同鳴治小飲集句奉謝

青雲器業我全疎終日王門強曳裾尺組挂身何用說  
閒情入骨若為除高人屢解陳蕃榻多病能忘太史書  
明日珂聲出城去登山臨水復何如

聞陳考功朝用集古甚富詩以問之

信手同繙集古書自將佳句著州閭愁占蒼草終難決  
欲報瑤瑤愧不如門掩落花春去後酒醒孤枕鴈來初  
人間富貴渾如夢消得擲掄勢利疎

惟我維揚先生以河南僉憲領南畿屯田事成績  
上京師道得微疾乃卜居城陰慨然有終焉之志  
維時知先生者謂其卓特絕倫之才淵然博古之  
學清白自守之操而使之循資待次於銓曹之籍  
固非所宜先生當未衰之齒承當遷之秩而遽自  
引退亦非士大夫之所望者其言激切反覆而先  
生之意終自有未釋也東陽不才早以契家子受  
門下業恩義無與為比蓋於此有不能已焉屬以



幽憂抱疾杜門經歲方屏去筆札不能輒有所  
述因集古句十律以代所欲言其始序先生出  
處之概中述先生之志而終以鄙意自附於士  
大夫之論惟不鄙而終教之幸甚

二十餘年別帝京曾拋竹馬拜先生金章玉節鳴騶遠  
潁水嵩山別眼明苦節難違天子命夢歸偏動故鄉情  
平生志業倣唐舜直傍巢由寫一名

百官初謁未央宮十載長安似夢中歲發金錢供御府

口銜丹詔出關東魚能深入無憂釣鳥覆危巢宣待風  
借問路傍名利客飛揚跋扈爲誰雄

遙望旌旗汝水頭放歌會作昔年遊誰能載酒開金盞  
好爲裁書謝白鷗路入塵中纔有累道非身外更何求  
人間岐路知多少水遠山長步步愁

寂寞相如臥茂陵閉門懶出病相仍囊空不辨尋春馬  
眼暗難看細字蠅縱酒欲謀良夜醉舊遊却憶向來曾  
年年檢點人間事祇有家貧免盜憎

黃道星辰北斗邊却來平地作神仙蓬萊豈隔三千里  
時論同歸尺五天未許謝公同隱逸且隨蘇晉暫逃禪  
悠然到此忘情處目送歸鴻手絕絃

却算遊程歲月遙平蕪歸思綠迢迢敢於世上明開眼  
莫怪先生懶折腰扶老未須蒼玉杖還家初散紫宸朝  
故人雖在多分散且可相從慰寂寥

玉帛朝回望帝鄉才名長帶粉蘭香欲知潁水新居士  
莫奏開元舊樂章舉世盡從愁裏老暮年初信夢中忙

如今不要教人識遙謝春風白面郎

擾擾車塵負薜蘿綠楊摧折舊官河清江碧石傷心麗  
白水青山引興多去日兒童皆老大生涯心事已蹉跎  
自慚久在諸生列奈此承明侍從何

白葛輕衣稱帽紗早將玄髮到京華離情不斷千尋綆  
奉使虛臨八月槎鶴子見貧能代僕野人懷惠欲移家  
知公不久歸鉤軸好趁春風入殿衙

滄洲漭沆帝城邊獨上江樓思渺然緩帶輕裘成昨夢

濁醪麤飯任吾年中原人物思王猛五絕才名數鄭虔  
此際交親常引領春風雙佩好朝天

集句後錄小引

甲子之夏予歸自闕里道觸炎暑及冬而病凡三閱月  
自度衰疾三上疏乞休弗獲幽情鬱思欲托之吟諷而  
未能者畧尋往年故事集古句以自況故舊問遺亦藉  
爲往復僅得若干篇而諸體畧具常檢往年所錄久失  
去比始得之因再錄後卷并爲帙以藏蓋雖一時情興

所至無關大政然戲而不爲虐談而不駁感時觸物之意亦存乎其間是亦不可棄哉弘治乙丑春二月十日西涯識

病中言懷長句

冬至至後日初長雪山冰谷晞大陽心搖目斷興難盡  
身欲奮飛病在牀自愛安閒忘寂寞紗帽接羅幃不著  
醫師盡勸先停酒朝客偶知先送藥老去悲秋強自寬  
不如高臥且加餐亦知世上公卿貴信有人間行路難

豈合此身居此地可爲一官妨快意春來江上幾人還  
夜半燈前十年事年去年來來去忙感時撫事增惋傷  
明年已身向天子不待彈劾歸耕桑

又六首

歸思憑高黯未消霏霏拂拂又迢迢律回歲晚冰霜少  
秋盡江南草木凋新結茅廬招隱逸便應黃髮老漁樵  
年年檢點人間事未有涓埃答聖朝

謝朓裁詩月滿樓每因風景却生愁愁占著草終難決

欲採蘋花不自由  
錦纜牙樯非昨夢  
楚雲湘水憶同遊  
書生事業真堪笑  
語不驚人死不休

燒竹煎茶夜臥遲  
故山歸計入支頤  
明時遇主誰甘退  
老病旁人豈得知  
臘雪已添牆下水  
山風吹盡桂花枝  
遊人過盡柴門掩  
獨立蒼茫自詠詩

五月扁舟過洞庭  
地分南北任浮萍  
衣巾半染烟霞氣  
雲水長和島嶼青  
故國山川皆夢寐  
昔年親友半凋零  
思鄉懷古多傷別  
何處清風起獨醒



望美人兮天一方碧水浩浩雪茫茫病身最覺風露早  
離夢杳如關塞長竹葉於人既無分梅花滿枝空斷腸  
青袍白馬有何意萬事不如歸故鄉

午時起坐自天明又對青燈夢不成漫道人間無正色  
莫教天下笑虛名酒酣舞誰相拽客至從嗔不出迎  
猶有誇張少年處無端詩思忽然生

東劉東山司馬二首

日暮驚沙雪亂飛將因臥病減朝衣身無彩鳳雙飛翼

家在寒塘獨掩扉白石淨敲蒸水火苔痕常滿釣魚磯  
同年同病同心事來歲如今歸未歸

才名長帶粉闌香身去東山間草塘苦節難違天子命  
回軒應問石渠郎有時雲外聞天樂劇欲樽前說故鄉  
聖代止戈資廟畧一篇江漢美宣王

歲暮長句

歲云暮矣多北風杲杲寒日生於東今宵散歎臥如弓  
至齊不語坐高春疾病深藏稱懶慵軟吹香飯緣老翁

小槽酒滴珍珠紅華裾織翠青如葱故人相見來從容  
人生何事不匆匆幾時奏事建章宮明時帝用補山龍  
十年遭際歎無功此時漫與蠹魚同不知造物哀龍鍾  
故著昏花阿堵中可因霜雪愧青銅祇憑天地鑒孤忠  
行藏在我有窮通長安雪後見歸鴻山色不如歸興濃  
由來勲業屬英雄人間鷓鴣香難從瀟湘洞庭暎虛空  
故山還著白雲封吾將此地巢雲松

歲暮即事二首

南雪不到地芳華詎能久北上太行山雪片大如手寒  
天十二月古木餘衰柳夜來風雨聲此事古未有感悟  
求其端從卯將至酉欲言無子和夢我平生友道路阻  
且長故人今在否少壯無幾時親故傷老醜百憂感其  
中安得不皓首遙遙沮溺心汲汲魯中叟區區諸老翁  
悠悠百世後

我衰更懶拙頽然臥前檻天寒霜雪繁挾纊如懷冰平  
生所嬌兒連翩戲中庭憂喜相紛擾倏如流電驚弱女

雖非男遠嫁難爲情他鄉各異縣路險不得征寄書常  
不達來鴈有餘聲萬族各有託歸鳥趨林鳴人生穹壤  
間安得不合併無爲牽所思我心始和平我欲竟此曲  
庶幾知者聽

擬古將進酒

春風扇微和金樽綠酒生微波晴雲高鳥各自得遣我  
寧不蒼顏酡百年三萬六千日向來哀樂何其多將進  
酒世間萬事無不有君子有所思少逢舊親友小人亦

不聞終日馳車走病須書卷作良醫欲讀嗟如箝在口  
我亦有丹君信否破除萬事無過酒杯行到君莫停手  
君不見玉川子六碗通仙靈衆賓皆醉我獨醒我歌一  
曲君試聽醉翁之意不在酒轉見千秋萬古情君不聞  
濁醪有妙理君獨未知其趣耳古人今人若流水眼中  
之人吾老矣

春日奉懷方石先生四首

一軒還向舊堂開解組東歸亦快哉兩度立朝今結局

百年多病獨登臺山中習靜觀朝槿石上題詩掃綠苔  
安得與君幽討處陶然共醉菊花杯

夕陽無限水東流好爲栽詩謝白鷗處士當爲天下士  
似君須向古人求故鄉今夜思千里月色江聲共一樓  
自笑百年家鳳闕不知能似浙江不

菊花時節羨君回喜過嚴陵舊釣臺新句漸高塵累少  
鄉音無改鬢毛衰東山芳意須同賞王式當年本不來  
應笑我曹身是夢不衝風雨即塵埃

鶴拂烟霄老慣飛令人長憶謝玄暉古來賢傑知多少  
舊日人民果是非酒碗茶甌俱不厭谷雲溪鳥尚相依  
君今獨得居山樂我已無家不念歸

壽潘南屏先生六十

乙丑正月七日

期君新歲奉恩光人日題詩寄草堂家住層城鄰漢苑  
馬隨仙仗識天香絲綸閣下文章靜安樂窩中日月長  
人壽百年今六十朝朝染翰侍君王

衮衮諸公車馬塵世情誰是舊雷陳貌先年老因憂國



天爲詩曹剩借春不敢妄爲些子事也能康濟自家身  
世間甲子還不得明日從頭一遍新

芸閣爲郎一命初論交已是十年餘佳期笑把齋中酒

是日郊齋

鴻寶誰收篋裏書潘岳序年因鬢髮馮唐已老聽

吹噓惟應鮑叔偏憐我欲報瓊瑤愧不如

看取霜髯六十翁此心期與故人同能安陋巷無如我

時子在告

定把青藜獨照公復有樓臺銜暮景但將懷抱醉

春風長生不待爐中藥何處吹簫向碧空

高會當年喜得曹英名常得與時髦長嗟博士官猶屈  
獨有揚雄賦最高已入玉堂同視草幾陪春色醉仙桃  
滿頭白雪丹心在郎署何曾歎二毛

新春雜興

從官千騎擁鑾輿遠上天階禮玉虛遙羨枚臯扈仙蹕  
茂陵秋雨病相如

塞北天南萬里長江湖安得便相忘春風無限瀟湘意  
却望并州是故鄉

仙家多駐玉華宮也有清愁白髮翁春色惱人眠不得  
錯教人恨五更風

無才不敢累明時憶向天涯問紫芝多病所須惟藥物  
病深何藥可能醫

挂冠殊不爲高年祇是當時已惘然莫怪天涯棲不穩  
在朝長詠卜居篇

同情雲路可翱翔獨歎青山別路長自笑不如泗浦鴈  
鴈飛猶得到衡陽

爲園須接邵平瓜小徑升堂舊日斜自是不歸歸使得  
春明門外即天涯

春愁黯黯獨成眠病對椒花獨自憐東道若逢相識問  
恐驚憔悴入新年

浣花溪水水西頭曾向慈恩寺裏遊頭白故人無在者  
夕陽依舊渚邊樓

平生雅志重丘山未報涓埃兩鬢斑清切會須歸有日  
睡烟歌月老潺湲

身雖疾病尚吟詩三日無詩自怪衰  
戲集句成圖素壁  
老身真覺似童兒

寄衍聖公

歸騎西風擁暮笳聖恩深念魯東家  
合歡却笑千年事  
奉使虛隨八月槎  
心想夜間惟是夢  
眼知別後自添花  
知君未愛東湖色  
水底魚龍漸可叉

松露先生夢懷翰林舊遊有詩見寄  
次韻奉以  
答之

山店鐘殘夢到時遙思獻納在丹墀卷舒在我有成算  
藥餌扶吾隨所之青草同心多逸興白頭吟望苦低垂  
文人才力猶強健搖落深知宋玉悲

懷麓堂集卷九十七

欽定四庫全書

懷麓堂集卷九十八

明 李東陽 撰

文續稿八

哭子錄

哭兆先次體齋傅先生韻

少日生兒極苦辛  
生時成幻死時真  
光陰倏爾過雙眼  
形影孑然只一身  
秋榜定誇攀桂手  
暮歸愁對倚門親

哀歌不用存遺稿祇恐他年累故人

次韻答方石謝先生

生平在乙怕逢辛此語荒唐却近真  
江海縱然能比恨乾坤空大不容身  
文章自與箕裘別骨肉誰兼道義親  
欲抱此情那向說先生原是虎傷人

再次體齋先生哭兆先韻

飛凰別後有新雛五色文章衆所無  
八翼門高還自折九原聲斷不容呼  
揮毫對客才空俊躡屐登山興已孤



檢點舊書三萬卷百年辛苦為誰圖

竹几藤床一病身向來魂夢已成真浮名在世翻為累  
造物何心也妬人買地南邦空習隱望雲東岳苦思親  
不應又作吞聲別老淚無多不沾巾

因兆先病中韻答方石體齋二先生

兩日愁多白盡頭誰教骨肉轉成仇哀歌激切長侵夜  
弱質凋零可待秋覽勝獨迴東郡馬憶歸空買洞庭舟  
不知死訣非生別猶悔當年誤遠遊

雪裏商山半白頭  
豈知山與雪為仇  
詩腸思苦難禁夜  
病骨寒多不耐秋  
九陌風花空匹馬  
五湖烟月自扁舟  
文章不藉雲霄力  
剛得江山助遠遊

圭峯董司空寄扇兆先欲焚之  
樞前以代掛劍  
且侑以詩因感其義次韻奉答

空江落木夜紛紛  
遠道書來正憶君  
白髮有情憐顧況  
青雲無路歎劉蕡  
交期聚散三生隔  
世事盈虧兩字分  
聞道藥籠無棄物  
願從殘稿拾遺文

一握清風萬里來故人遙在鳳凰臺多情欲共香魂語  
什襲猶煩老手開竹淚有斑和露滴燎烟無力被風迴  
不知地下還知否地下如知亦可哀

和王古直哭兆先韻二首

漫道人琴一夜亡哀絃誰寫故人章才如卞玉元名楚  
命比童烏不姓揚華表城頭真浪語干將地下有龍光  
畫圖指點趨庭事恨殺多情杜古狂

杜堇題別號古狂嘗  
為兆先作頌卷圖

極知世事如春夢不信人生有畫遊今日眼看埋玉樹

當年心許撞烟樓空勞掛劍來吳季翻悔藏書似鄴侯  
多少西湖湖上水一時和淚共東流

次陳都御史韻八首

夜臺聞哭聲哭遠聲漸邇誰知握手悲翻甚倒衣喜痛  
定兩無言燈前黯相視我時餌湯藥僵臥方擁被憶別  
亦須臾神交豈疑似笑談勞記憶意態極摹擬共期魚  
龍化未愛鸞和峙竭來經月病愁緒結不理慰藉有深  
辭通家二三士哀歌感今昔高誼一生死死者恐弗聞

生者猶在此忘情固非義情劇乃為累有淚欲成河東  
流浩無涖

其二

向時科舉業有戒在歌詩寧圖目前捷秘彼胸中奇遺  
文不多得往事何能追幸當英俊場猶得親驅馳雖非  
盡精力庶以輸情私今我忽觸目讀之但嗟咨一讀廢  
宵眠再讀忘晨炊三讀輟掩卷起立向堦墀平生趨庭  
事所得僅如斯他日蓼莪篇誰當歌父兮

其三

振衣思崇岡濯纓受清沚渠生不出戶有興諒非邇如  
聞解吾意直欲遠城市歸與志不遂輾轉勞夢寐買田  
復卜居此計方未已渠在我不歸渠亡我安恃為官累  
妻孥世路紛皆是渠雖未知道臭味頗予似登高忽不  
見望遠如有俟猶恨獨歸遲青山負雙履

其四

文章若山斗跬步勞攀躋道德若漁獵終焉費筌蹄長

塗不易至志士恨每齎吾子獨何為超然出羣迷如居  
百物市貴不數象犀如觀大海津怪不駭鯨鯢傷哉不  
復見永矣含悲悽

其五

交情若市易世路如棋枰空歌伐木篇幽谷無丁丁吾  
兒託英俊意氣千鈞輕心當斷金石興豈耽孟觥父行  
友鄭莊長者過陳平文成衆所貴名在汝不爭賢哉西  
臺彥重此骨肉情譬如喬松枝下有葛藟縈脉脉青雲

外誰當和友聲

其六

幽人甘固窮達者不諱死物理多偏頗吾生有涯涘喪  
明亦真情顧為達者訾誰哉能不憂矯枉非具美俯仰  
天地間何獨無父子角解與豚犬往往不相似吾才豈  
足多吾家合遺祉未論骨肉親嗟嗟失佳士

其七

蒙翁喪四子豈復為人父盛年氣飛揚永路身齟齬於



我得外孫代為詩書主終焉亦凋謝我與翁為伍人言  
孫似翁文字足繩武鬱如千尋柏嘉種出新甫未登廊  
廟用先罹釜斤苦痛爾不翁如我心酸欲剖

其八

傍架檢我書就床理我琴書殘有遺香琴斷無餘音傷  
哉歲月邁默坐整我衿萬事勿復道繁憂劇難任塵帙  
污我目哀緒傷人心心目兩無用不知盲與暗

次顏士廉編修韻六首

青陽忽改歲白日慘不光生死復幾時幽明渺相望哭  
聲徹九地矯顧遍八荒閉門讀哀誄卷帙動盈箱勞君  
贈襴情念之徒徬徨

其二

閒雲不作雨死水無生萍嗟嗟薄命人未壯目已瞶榮  
華能幾何奄忽成凋零至意渠獨領嗚哀我親聆耿如  
黃城燈初心尚晶熒念之不能忘水天終吾齡

其三

念彼平生交切磋多箴言如君合師交相視猶弟昆居  
然入室久艾蕭化蘭蓀植弱以為強磨光發其昏一朝  
遽淪落此意將誰論

其四

文章各異尚得失動相齟學古者猶然豈獨論藝舉當  
其得意時感激中自許自渠淪沒後慵復事毫楮擲筆  
罷哀吟空堂正風雨

其五

塞翁既馬失賊穀俱羊亡有子不及成無者同惋傷死  
生亦大事父子乃天綱誰將蓼荼毒置我甘脆腸魂氣  
無不之遺體先歸藏他日治田時歸來但茫茫

其六

短衣立長松我夢忽見之平生舊恩愛宛爾不復疑形  
骸獨委棄魂魄相因依勸君勿說夢使我聽欲癡夢者  
有覺時死者無還期死生亦夢覺高論何崔嵬因君復  
深悟千秋竟同歸

次韻答海釣二首

秋風一夜起關城  
哀調驚傳耳為傾  
四海交游誰骨肉  
兩家父子盡平生  
來鴻去鴈年年事  
白日青燈字字情  
猶記綵衣趨侍日  
幾回當客誤呼名

少日才華滿帝城  
衣冠四座一時傾  
去來今事總成夢  
一十七年空此生  
老有箕裘誰繼業  
病中骨肉轉傷神  
不知精力緣愁減  
猶向深山問藥名

李白洲侍郎屠元勲都憲有詩弔兆先次韻奉答

空懷樽酒試論文今日高軒又過君  
燕市價高誰更問楚招聲斷不堪聞  
搆成舊屋驚風雨種得新松恨斧斤  
自古人才何敢預祇將科第惜劉蕡

次錢與謙修撰韻

兆先嘗從學與謙

有口莫問天天道長悠悠有石莫填海海水何時收  
閉門掩青鏡無言搔白頭靜觀得物理定勝非人謀  
書香既有亭懷麓亦有樓平生堂構心付此土一抔  
憶當童卯歲經史實研求方期成豹變竟抱龍蛇羞  
往事勿復

陳茲生遽長休空來束芻帛永負擔簪遊

次韻答邵國賢提學五首

話別存亡異論交父子真書來剛慰我讀罷轉愁人世  
事經雙眼宗祊在一身他年重握手相對各沾巾

其二

累月君聞訃經年我得書傳疑終作信凝望總成虛歲  
月呻吟裏江山涕淚餘閉門無弔客愁坐廢冠裾

其三

節改成新歲吾衰更老親  
遠書煩故舊哀調起比鄰  
駐馬瞻雲日聽雞問寢晨  
此情拋未却時復上心頻

其四

擬學全家隱常為出世談  
壯心猶夙昔歸計失東南  
誼重思鄰卜情多勝館驂  
江湖空滿地無處着茅菴

其五

遂有他年卜真成觸事悲  
藏書餘舊篋封竹剩空枝  
白髮三千縷愁心十二時  
悲歌聊當哭何意復吟詩



次何員外子元韻二首

舊業銷沉筆硯中  
半生何但坐詩窮  
假山石減峯全瘦  
落葉聲稀樹已空  
豈謂形神非夢幻  
浪誇頭角自兒童  
淵明貴子君休笑  
我已無心效此翁

東野詩從死後昌  
祇今誰在復誰亡  
人間夢筆非無兆  
地下修文信有郎  
牛斗幾時衝劍氣  
簡編何日繼書香  
閉門只合蕭然坐  
十日愁多雨正滂

又一首

回首黃梁是夢中直從斑白記兒童  
兒童過盡還斑白  
獨立蕭蕭樹底風

次王主事叔武韻五首

回風捲飛花愁緒紛欲起  
白雪無餘聲青雲有遺止  
客來強銜杯客去空覆簋  
春寒衣袂薄夜久燈焰死  
從師思問道歸妹期在此  
意氣夙徒勤終焉竟安恃  
承歡與服養瑣瑣焉足紀  
往者已復非來者寧可俟

其二

隙地苦無多書齋不盈丈向非通家客誰與散幽况憐  
渠隔光景老我稀半行愁看假山雪宛在危峯上憶觀  
聯句時此興何由忘誰將悶懷鬱轉使悲歌放兀坐比  
書空咄咄成悲愴

其三

輟君思友篇聽我哭子詩君情固未已我恨猶多遺皇  
天不祚善降禍良亦奇省躬或自致暗室空獨知三遷  
不出都生長竟于斯斯干有嘉詠遂作終身悲

其四

都來一寸心中有九回腸腸中何所有萬恨復千傷迨  
歲若偏仄逢春亦傍徨漢儒有遺女僅可補書亡尹侯  
有令子空使履晨霜古今本殊科事變亦靡常渠生詎  
非壽已勝同兒殤

其五

多君義斷金顧我心匪石每聆慰藉詞日夕無厭射苦  
調少懼悰明珠疑暗擲秋憐丹桂凋閔憶黃楊色磨礮

漸光彩長養空羽翮平生愉惋容儼若親几席竭來蹉跎計尚未成窀穸所嗟身淪沒安用名輝籍

次石檢討邦彥韻三首

中歲意不適衰病相侵陵還思後生人命薄如春冰閒居讀古賦援筆寫大鵬趨庭比授簡巾襲累數層因懷江海興勇欲辭眾曹茲謀竟落寞斷墨空殘藤開絨見渠名益使痛恨增擁爐夜不寐坐待朝陽升

其二

荒郊有蔓草大道無幽蘭蹄蹠有停潦長江無回湍渠  
生亦得地都市非林巒半生長養心付此指一彈痛定  
忽復痛仰天但長嘆每逢故舊人宛作骨肉看感物泣  
楚玉傷時詠齊紉悲哉勿重道老淚空成瀾

其三

庭梧葉盡脫慘澹落日黃鳳雛忽飛去哀調鳴孤凰左  
盤右辟抑復揚宛若戲綵在我傍視之不見轉茫昧燭  
影坐炤如人長愁多夜深不得睡強起傍戶立欲僵嘯

蛸掛壁塵滿床床頭古劍無精光開緘檢書書在麓哭  
聲應山山為瀑噫氣長噓衡岳雲淚痕徧洒湘江竹東  
南地缺天西傾人生安得長豪英古今成敗類如此我  
獨痛恨何時平由來生死同朝夕轉使歡娛成悼惜方  
將一髮擁千鈞空教二子埋雙壁每嗟杜牧難開口欲  
種淵明五株柳斷送年光豈在多依棲世路那能久暫  
時自遣還自哀冷風似覺魂歸來誰當為築歸來臺無  
人解和白雲調有士不酬黃金盃石郎石郎惟子可語

此君看宿草生蒼苔

懷麓堂集卷九十八